

程子



蔡中郎文集序

半頁七行行十四字

漢蔡中郎傳邕博學辭章為靈紀十齋及雜文凡百四  
篇傳於世傳所載者釋晦出冀刺史闕疏陳政要七事  
金商門荅災異疏被收時表及世傳獨斷七訓文選陳太  
丘等碑文初學記短人賦總十數篇而已按唐書藝文  
志洎吳氏西齋書目並云邕集十卷今之所傳總十卷亡  
外計六十四篇其中可疑者宗廟頌贊述武皇平亂之功又  
有昊天眷祐我魏之句蓋以宗廟指魏也又有魏武帝祀喬  
太尉文稱丞相冀州牧魏主操謹遣掾再拜祀姜伯淮碑  
稱建安十二年卒劉鎮南碑建安十三年薨太和二年葬按  
邕本傳董卓被誅邕為王允所害時年六十一據邕金商



門荅災異被收表云臣今年四十八靈帝光和元年也董卓被  
誅獻帝初平三年也光和元年戊子至初平三年壬申邕正六年  
一矣又初平四年至四年改興平二年改建安至五年正月薨操薨  
三年改建康十月禪于魏王丕即初平四年是為二十六年太和二年  
乃魏明帝之二年至是又八年計邕死已三十六年矣按初平已前操  
尚在誅卓之歲操始為東郡太守破黃巾於壽張至建安十三年操自  
為丞相二十一年操自進為魏王亦有魏宗廟而操不得先稱為魏武帝  
及武皇也其姜伯淮鎮南薨葬相後年代差遠邕安得紀述耶是集  
也今既缺五卷矣見所傳者蓋後之好事者不本事迹編他人之文相  
混之耳非十五卷之本編固矣達安黃初之文體多相類復不遠廣  
披眾集固不可知其誰之作也偶閱而有得識於帙末天聖紀  
弼龍集癸辛余月哉生魄明後八日海陵西齋平陽歐靜識  
之序

### 蔡中郎文集叙



明朝列大夫叅議江藩東陽王乾章撰

蔡中郎邕陳留郡人也文集若干卷舊刻于吳  
中夫中郎博學善文為漢季稱最今雖遐陬僻  
壤賈童牧孺靡不思慕詠歌顧桑梓之區制作  
不少槩見俾文采無徵寧非典籍之缺然者歟  
或曰文因人而傳中郎乃文人之無行者是以  
無傳焉此又不然古人之所為要不可以淺衷



測識也彼其際百六之厄丁陽九之窮皆欲屈  
志淪汙默爲推挽故楊雄獻美於新莽荀彧濡  
跡於曹瞞彼豈嬰情好爵哉其意蓋有爲也中  
郎當漢靈時以議郎病免及董卓崛起屢徵不  
就劫之以威乃就旬日之間周歷三臺羗胡梟  
獍中郎豈不知之其應召也固將托爲心旒砭  
其膏肓正論排之微詞諷之從容以開導之反  
復以規諭之芟維社之毒蕪噓炎光於旣燼乃

其心也彼昏不知卒罹燃臍之慘邕亦駢首就  
戮哀哉故子雲以符命投閣文若以九錫誅夷  
中郎以一嘆隕命三子者皆比匪之傷其心乎  
漢則一也不然邕嘗取朱穆以貞孤謂有羔羊  
之節讚楊秉之清儉雅重純白之操豈依卓以  
苟富貴者歟矧邕曠世逸才學無不貫使其不  
死必將抽金匱石室之藏品題軒輊勒成一代  
之典與子長孟堅爭馳不知孰爲先後耳司徒



卷之四  
序  
二  
允慮其訕謗竟寘之刑滅典覆紀難乎免於世  
矣予過陳留思中郎風致欲吊其廬與墓飛烟  
冷劫增慨噫焉檢笥中得中郎文集檄陳留令  
徐子噐校讎而雕之徐令雅尚古作與起斯文  
力任茲役亦以爲邑之鄉先哲也殺青已竟請  
予斯文乃弁諸首若夫窮經取則孝感兎祥則  
誌乘已備而識焦琴辨柯笛乃博洽細事皆可  
畧也故予著其事卓之心示後之人亦爲解嘲

云爾

萬曆元年仲春望日書



蔡中郎文集目錄

一卷

故太尉喬公廟碑

東鼎銘


中鼎銘

西鼎銘

黃鉞銘

太尉喬公碑

朱公叔議





鼎銘

墳前石碑

王子喬碑

二卷

郭有道林宗碑

文範先生陳仲弓碑

陳太丘碑

陳太丘碑

汝南周巨勝碑

彭城姜伯淮碑

陳留范史雲銘

玄文先生李子材銘

處士園叔則銘

三卷

司空楊秉碑

臨晉侯楊公碑

漢大尉楊公碑

文烈侯楊公碑



琅邪王傳蔡朗碑

劉鎮南碑

四卷

太傅文恭侯胡公碑

胡廣碑

胡公碑

太傅祠前銘

漢交趾都尉胡府君夫人黃氏神誥

太傅安樂侯胡公夫人靈表

議郎胡公夫人哀讚

五卷

光武濟陽宮碑

太尉汝南李公碑

陳留索昏庫上里銘

陳留太守胡公碑

胡碩碑

六卷

荅丞相可齋議



幽冀二州刺史久缺疏

難复育上言鮮卑仍犯諸郡

荅詔問灾異八事

被收時表

七卷

和熹鄧后謚

爲陳留太守上孝子

薦邊文禮

薦皇甫規

八卷

表太尉董公可相國

讓尚書乞在閑冗

巴郡太守謝版

宗廟祝嘏辭

九祝辭

宗廟迭毀議

上始元服與羣臣上壽

表賀錄換誤上章謝罪



讓高陽侯印綬符策

九卷

京兆樊惠渠頌

掾史張玄祠堂碑銘

袁滿來碑銘

幼童胡根碑銘

司徒袁公夫人馬氏碑銘

濟北相崔君夫人誄

十卷

明堂月令論

月令問答

外傳

胡廣黃瓊頌

上漢書百十志疏

述行賦

短人賦

飲馬長城窟行

釋誨



篆勢

隸勢

蔡中郎文集目錄

蔡中郎文集卷之一

漢左中郎將蔡邕伯喈傳

太尉喬公廟碑

光光列考伊漢元公克明克哲實獻實聰如淵之浚  
 如嶽之嵩威壯虓虎文繁雕龍撫柔疆垂戎狄率從  
 敷教中夏五教攸通帝謂我后朕嘉君功命君三事  
 時亮天功公拜稽首翼翼惟恭左右天子祗厥勳庸  
 庶績既熙黎民時雍上下謐寧八方和同丕顯伊德  
 作憲萬邦公諱玄字公祖少辟孝廉辟司徒大將軍



府爲侍御史牧一州典五郡出將邊營入掌機密歷  
三卿同三司享年七十五光和七年夏五月甲寅以  
太中大夫薨于京師朝廷所以吊贈如前傳之儀九  
月乙酉葬於某所三孤故臣門人相與述公言行咨  
度禮制文德銘于三鼎武功勒於鉦鉞官簿第次事  
之實錄書于碑陰俾爾昆裔永有仰於碑陰云

喬氏之先出自黃帝帝葬於橋山子孫之紹基立姓者  
咸以爲氏漢興世以禮樂爲業高祖諱仁位至大鴻臚  
列名於儒林祖侍中廣州相考東萊太守公稟性貞純

幼有弘姿剛而不虐威而不猛聞仁必行睹義斯居文  
以典術守以繼固弱冠從政當官而行刺史周公辟舉  
從政所部二千石受取有驗公糾發贓罪致之於理時  
有椒房桂戚之託周公累息不爲之動史魚之勁直山  
甫之不阿於是始形舉孝廉除郎中洛陽左尉特進頴  
王梁不疑爲河南尹當事以對是時畏其權寵而爲屈  
辱者多矣公不折節解印綬去辟司徒舉高第補侍御  
史以詔書考司隸校尉趙祁事廷尉郭貞私與公書非  
接使御命之儀公封書以聞貞以文章得用鬼薪公離



司寇辟大將軍梁公幕府屢以救正于其隆指將軍嘉  
之無言不讎又以高第補侍御史在職旬月羗戎匪茹  
震驚隴漢西府舉公拜涼州刺史威名克宣凶虜革心  
清風席卷至則無事車師後部阿羅多卑居相與爭國  
興兵作亂公遣從事牛稱何傳舉輕騎奉辭責罪收阿  
羅多卑居擊燉煌正處以聞阿羅多爲王卑君侯稱以  
奉使副指除侯部侯不動干戈揮鞭而定西域之事人  
以爲美談又值饑荒諸郡饑餒公開倉廩以貸救其命  
王者以舊典宜先請公曰若先請民已死廩訖乃上之

詔報曰邊穀不得妄動玄擅出於是玄有汲黯憂民之  
心後不以爲常公達於事情剖斷不疑皆此類也遷齊  
相視民如保赤子討惡若赴水火刑明賞遂民知勸懼  
臨淄令賂財賦多遂正其罪受鞠就刑沒齒無怨以不  
先請免官徵拜上谷太守民有父子俱行凶人人惡言  
當道曉之不止其子殺人公捕得見其悔辨不舉文書  
以遇赦令蕃縣有帝舜廟以故事齋祠晉史張機有  
懲罰貨祠巫自託以舜命約公云不得譴公覺其奸態  
收考首伏即日伏辜遷漢陽太守上邽令皇甫貞贓罪



明審收考髡鉗死于冀市後以病去徵拜議郎司徒長  
史循王惺桓帝同產以懷逆謀黜封瘿陶王以公長於  
襟帶拜鉅鹿太守惺畏怖明憲檢于靜息自將作大匠  
徵未到而章謗先入故轉拜議郎遂用免官徵度遼將  
軍遷河南尹少府大鴻臚司徒司空託病而去悉引衆  
災雖非已負公言以自劾遜位歲餘拜尚書令時河間  
相蓋升以朝廷在藩國時鄰近舊恩歷河南太守太中  
大夫在郡受取數億以上創毒深刻公表升會放狼籍  
不顧天綱損辱國家公乃上招怨當肆市朝以謝兆民幸

遇贈令罪除惡在可免升官禁錮終身沒入財賂非法  
之物以充帑藏懲戒群下連表上不納而升遷爲侍中  
公稱病辭徙拜光祿大夫復拜太尉如前遜位復拜少  
府病不就職拜太中大夫凡所獲祿皆公府所特表選  
臨難受位自九列之後咸以明公紀綱張弛勇決不回  
析見是非明作達於事機燕居從容申申夭夭和樂寬  
裕愛士親仁凡見公容貌聞公聲音莫不熙怡悅懌思  
樂莫則來者忘歸去者願還雅性謙克不吝於利欲雖  
衆子群孫竝在仕次曾無順媚一言之求身沒之日無



獲大位在百里者莫得好縣北方公孫未有若茲者也  
初公爲舍於舊里第卒推與其孤至於即世柩殯無所  
清儉仁與之効於斯爲著巍巍乎若德允世之表儀也  
已

東鼎銘

維建寧三年秋八月丁丑延公于玉堂前廷乃詔曰其  
以大鴻臚喬玄爲司空再拜稽首以讓帝曰俞往哉三  
讓然後受命公乃虔恭夙夜帝采勤施八方旁作穆穆  
以對揚天子丕顯休命越在先民毗于天子丕著股肱  
畢其思心式率天行式昭德音公亦剋紹厥由鑒于法  
罔敢不法憲于誠罔敢不誠用摠是羣后保乂帝家勛  
在方策民咸曰休哉惟帝念功越若來二月丁丑遷於  
司徒

中鼎銘

維建寧四年三月丁丑延公登于玉堂前廷乃制詔曰  
其以司空喬玄爲司徒公拜稽首以讓帝曰俞往哉三  
讓然後受命公允迪厥德宣力肆勤戰戰兢兢以役帝  
事越其所以率夫百辟媚于天子天子曰都慎厥身修



思永同寅協恭以和天衷德則昭之違則塞之回乃不  
敢不弼枉乃不敢不匡股肱之事既充三事之繇允備  
灾眚作見乃引其責曰凡庶徵不若彝倫不叙是惟臣  
之職祇以疾告表越十月庚午記此

西鼎銘

維光和元年冬十二月丁巳延公入崇德殿前乃制詔  
曰其以光祿大夫玄爲太尉公拜稽首曰臣聞之三讓  
莫或克從臣不敢辭臣犬馬齒七十可以生可以死其  
戮力閑私悉心在公以盡爲臣之節于時侍從階階與

聞公之昌言者莫不惕厲如履薄冰旣乃碑表百代

黃鉞銘

孝桓之季年鮮卑入塞抄盜起凶奴左部梁州叛羗逼  
迫兵誅滯衍東移高句麗翻子百固逆謀竝發三垂騷  
然爲國憂念西府表喬公昔在梁州柔遠能邇不煩軍  
師而車師克定及在上谷漢陽連在營郡督力方剛明  
集御衆徵拜度遼將軍始受旄鉞鉦鼓之任扞禦三垂  
公以吏士頻年在外勤於奔命人馬疲羸撓鈍請且息  
州營橫發之役以補困憊朝廷許之於是儲廩豐饒室



磬不懸人逸馬同弓勁矢利而經用省息官有餘資執事無放散之尤簿書有進入之羸治兵示威戎士踴躍旌旗曜日金鼓霆奮守有山岳之固攻有必克之勢羗戎受首于西疆百固冰散于東隣鮮卑收迹烽燧不舉眎事三年馬不帶缺弓不受彊是用鑿石作茲鉦鉞軍鼓陳之東階以昭公文武之勛焉銘曰帝命將軍秉茲黃鉞威靈振耀如火之列公之在位羣狄斯柔齊斧罔設人士斯休

太尉喬公碑

公諱玄字公祖梁國睢陽人也大鴻臚之曾孫廣州相之孫東萊太守之元子也膺受純性誕有特表岐嶷而超等摠角而逸羣至於初紳高明卓異爲衆傑雄其性疾華尚朴有百折不撓臨大節而不可奪之風經藝傳記周覽博涉瑰琦在前靡所不識當世是以服重器歸高名州郡交請待以訪斷歷端首則義可行處瓜牙而威以布察孝廉除郎中洛陽左尉以公事去辟司徒舉高第侍御史直道而往用免其任辟大將軍西府表拜涼州刺史遷齊相以公事去詔書印綬即家拜上谷太



守遷漢陽太守徵拜議郎司徒長史鉅鹿太守被詔書  
為將作大匠為受罰者所章拜議郎即徵拜度遼將軍  
遷河南尹少府大鴻臚遂陟司空司徒託病遜位起家  
拜尚書令以疾篤稱拜光祿大夫後拜太尉久病自替  
復為少府太中大夫春秋七十五光和七年五月甲寅  
薨公性質直不憚強禦在憲臺則有盡規之忠領州郡  
則有虎眈之威其拔賢如旋流討惡如霆擊每所臨向  
清風光翔遠近豫震茲可謂超越衆庶彰於遠邇者已  
於是故吏司徒博陵顧烈廷尉河南吳懿等以為至德

在已揚之由人苟不皦述夫何考焉乃共勒嘉石永昭  
芳烈遂作頌曰

赫矣喬父秉文握武內為宗幹出為藩輔在憲彈枉  
竟由厥矩允牧于涼刈彼裔土爰將度遼亦用齊斧  
敷教四畿旋統京宇敦茲五服衆庶是與膺踐七命  
翼我哲聖登空補袞陟徒訓敬尹尉清宸熙帝之政  
終始為貞典章以定遺愛在民皇哀其命立石刊銘  
莫逸斯聽魂而有靈萬億其盛

朱公叔議



漢益州刺史南陽朱公叔卒門人陳季珪等議所謚云  
宜曰忠文子陳留蔡邕議曰昔在聖人之制謚也將以  
勸善彰惡俾民興行賢愚臧否依事從實雖文武之美  
靈厲之穢罔不具存自王公以降至于列國大夫皆用  
配號傳于無窮秦以世言謚而黜其事漢興以來惟天  
子與五等之爵然後有之公卿大臣其禮闕焉歷世彌  
久莫之或脩益州府君貫綜典術率由舊章始與諸儒  
考禮定議加陳留府君以益州之謚是後覽之者亦無  
間焉今子宜纂襲前業不忘遺則孝既至矣禮實宣之

謹覽陳生之議思忠文之意參之群學稽之謚法夫萬  
類莫貴乎人百行莫美乎忠故夏后氏正以人統教以  
忠德然則忠也者人德之至也而猶有三焉孔子曰進  
思盡忠又曰臣事君以忠奉上之忠也曰爲人謀而不  
忠乎又曰忠焉能勿誨乎謀誨之忠也春秋左氏傳曰  
小大之獄必以情情忠之屬也又曰上思利民曰忠撫  
下之忠也三者人之則而忠行乎其中益州府君自始  
事至沒身忠言不輟乎口忠謀不已乎心其在帝室正  
身危行言如砥矢策合神明蹇蹇之諫文章具存奉上



忠矣其在部臣匡救善導出自一心疑不我聽者果有  
躡履不測之禍謀誨忠矣爰牧冀州時值凶荒勞心若  
思勤恤度事誅斃貪暴糾戢貴黨雖則強禦當官能行  
夫豈淫刑將有利也發墓盜柩議而不罪夫豈漏姦察  
以情也撫下忠矣位在牧伯職據納言秉權食祿實有  
年數而居無畜好財貨不益糲食布衾饒謂之精麗昔  
魯季孫行卒宰庀家器無衣帛之妾無食粟之馬君子  
曰相三君矣而無私積可不謂忠乎而謚曰文子春秋  
外傳曰忠文之實也然則文忠之彰也忠以爲實文以

彰之事通議合兩名一致是貞儉之稱文也邾子籛籛  
卜遷于繹史曰利於民不利於君公曰民苟利矣孤亦  
與焉於是遷而遂卒謚曰文公是危身利民之稱文也  
衛大夫孔圉謚曰文子子貢疑焉惟敏而好學不耻下  
問仲尼與之是勤學好問之稱文也府君所在屢以忤  
違陷以深患苟除民害死生以之前後三黜一懼疾廢  
於身危矣兼包六典命世作師猶復宗事趙叟示有攸  
尊能下問矣有一於此猶可以稱况乃忠兼三義文備  
三德於古志不悖而謚法亦曰宜矣本議曰忠文子按



古之以子配謚者魯之季文孟懿子衛之孫文公叔文  
皆諸侯之臣也至於王室之卿大夫其尊與諸侯竝故  
以公配春秋曰劉卷卒葬劉文公公羊傳曰劉卷者何  
天子大夫也經又曰王子虎卒左傳曰王叔文公卒而  
同盟禮也此皆天子大夫得稱其禮與同盟諸侯敵體  
故也又禮緣臣子咸欲尊其君父故雖侯伯子男之臣  
自稱其君咸得曰公及其卒也異國之人稱之皆然是  
以邾子許男稱公以葬春秋之正義也以例言之則府  
君王室亞卿也有王叔劉氏之比以臣子之辭言之則  
有邾許稱公之文雖無土而其位是也今日公猶可若  
稱子則降等多矣懼禮廢日久將詭時聽周有仲山甫  
伯陽嘉父優老之稱也宋有正考父魯有尼父配謚之  
稱也春秋曰孔父子曰伯某父亡之稱也父雖非爵號  
與天子諸侯咸用優賢禮同順乎門人臣子所稱之宜  
可於公父之中擇一處焉斯不得稱子而已

鼎銘

忠文朱公名穆字公叔有殷之胄微子啓以帝乙元子  
周武王封諸宋以奉成湯之祀至元子啓生公于朱其



孫氏焉後自沛遷于南陽之宛遂大于宋爵位相龔烈  
祖尚書令肅宗之世守于臨淮考曰實爲陳留太守乃  
及忠文克慎明德以紹服祖禰之遺風悉心臣事用媚  
天子顯允其勲績尋綜六藝契闊馳思所以啓前惑而  
覺後疑者疊疊焉雖商偃其猶病諸初舉孝廉除郎中  
尚書侍郎獨念運際存亡之要乃陳五事諫謀深切退  
處畎畝以察天象驗應著焉孝順晏駕賊發江淮時辟  
大將軍府實掌其事用拜宛陵令非其好也遂以疾辭  
復辟大將軍再拜博士高第作侍御史明司國憲以齊

百僚矯枉董直罔肯阿順以黜其位潛于郎中羣公竝  
表乃遷議郎登于東觀纂業前史於是冀州凶荒年饑  
民匱而貪婪之徒乘之爲虐錫命作牧靜其方隅乃攄  
洪化奮靈武昭令德塞群違貞良者封植殘戾者芟夷  
去惡除盜無俾比而作匪用陷于非辜復徵拜議郎病  
免官徵拜尚書清一以考其素正直以醇其德出納帝  
命乃無不允雖舊臣納言山父喉舌靡以尚之享年六  
十有四漢皇二十一世延熹六年夏四月乙巳卒于官  
天子痛悼詔曰制詔尚書朱穆立節忠亮世篤爾行虔



恪機任守死善道不幸而卒朝遊南野人使權謁者中  
郎揚賁贈穆益州刺史印綬魂而有靈嘉其寵榮嗚呼  
哀哉肆其孤用作茲寶鼎銘載休功俾後裔永用享祀  
以知其先之德

墳前石碑

維漢二十一世延熹六年粵四月丁巳文忠公益州太  
守朱君名穆字公叔卒于京師其五月丙申葬于宛邑  
北萬歲亭之陽舊兆域之南其孤野受顧命曰古者不  
封墓祭服雖三年無不於窆人則易之吾不取

也爾其無拘於俗無廢于誠野欽率遺意不敢有違封  
墳三板不起棟宇乃作祠堂于邑中南舊陽里備器鑄  
鼎銘功載德懼墳封彌父夷于平壤於是依德像緣雅  
則設茲方石鎮表靈域用慰其孤罔極之懷乃申詞曰  
歆惟忠文時惟朱父實天生德丕承洪緒彌綸典術  
允迪聖矩好是貞厲疾彼強禦斷剛若讐彘亦不茹  
仍用明夷邁難受侮帝曰休哉朕嘉乃功命汝納言  
胤文祖蹤父拜稽首翼翼惟恭篤業不忘夙夜在公  
昊天不吊降茲殘殃不遺一父俾屏我皇我皇悼心



錫詔孔傷位以益州贈之服章用刊彝器宣昭遺光  
子子孫孫永載寶藏

王子喬碑

王孫子喬者蓋上世之真人也聞其仙舊矣不知興於  
何代博問道家或言潁川或言彥蒙初建斯域則具斯  
丘傳承先人曰王氏墓紹胤不繼荒而不嗣歷載彌年  
莫之能紀洎于永和元年十有二月當臘之夜上有哭  
聲其音甚哀附居者往聞而恠之明則登其墓察焉洪  
雪下無人踪見一大鳥跡有祭祀之處左右或以爲神

其後有人着絳冠大衣杖竹策立冢前呼樵孺子尹禿  
謂曰我王子喬也爾勿復取吾先人墓前樹也須臾忽  
然不見時令太山萬熙稽古老之言感精瑞之應咨訪  
其驗信而有徵乃造靈廟以休厥神於是好道之儔自  
遠來集或絃歌以詠太一或談思以歷丹田其疾病尪  
瘠者靜躬祈福即獲祚若不虔恪輒顛踣故知至德之  
宅兆真人之先祖也延熹八年秋八月皇帝遣使者奉  
犧牲以致祀祗懼之敬肅如也相國東萊王章字伯義  
以爲神聖所興必有銘表昭示後世是以賴鄉仰伯陽



之踪閔民慕尹喜之風乃會長史邊乾訪及士隸遂樹  
玄石紀遺烈俾志道者有所覽焉

伊王君德通靈含光耀秉純貞應大道羨父榮棄世  
俗飛神形翔雲霄浮太清乘螭龍載鶴軒載華笏奮  
金鈴揮羽旗曳霓旌懽罔極壽億齡昭篤孝念所生  
歲終闕發丹情存墓冢舒哀聲遺鳥跡覺舊城被絳  
衣垂紫纓呼孺子告姓名由此悟感怖驚脩祠宇友  
几遙饋餼進甘香陳時傾顧聲明煙匡流祉熙帝庭  
祐邦國相黔民光景福耀無垠

蔡中郎文集卷之一終



蔡中郎文集卷之二

郭有道林宗碑

先生名恭字林宗太原界休人也其先出自有周王季之穆有號叔者實有懿德文王咨焉建國命氏或謂之郭即其後也先生誕膺天衷聰叡明哲孝友溫恭仁篤柔惠夫其器量弘深姿度廣大浩浩焉汪汪焉奧乎不可測已若乃砥節勵行直道正辭貞固足以幹事隱括足以矯時遂考覽六籍探綜群緯周流華夏游集帝學收文武之將墜亟微言之未絕于時纓綬之徒紳佩之



士望形表而累附聆嘉聲而響和者猶百川之歸巨海  
鱗介之宗龜龍也爾乃潛隱衡門收朋勤誨童蒙賴焉  
用祛其蔽州郡聞德虛已備禮莫之能致群公休之遂  
辟司徒掾又舉有道皆以疾辭將蹈洪崖之遐跡紹巢  
由之絕軌翔區外以舒翼超天衢以高跼稟命不融享  
年四十有三以建寧二年正月乙亥卒凡我四方同好  
之人永懷哀悼靡所寘念乃相與推先生之德以圖不  
朽之事僉以為先民既沒而德音猶存者亦賴之於紀  
述也今其如何而闕斯禮於是建碑表墓昭銘景行俾

芳烈奮乎百世令問顯乎無窮其詞曰

於休先生明德通玄純懿淑靈受之自天崇壯幽濬  
如山如淵禮樂是悅詩書是敦匪惟披華乃尋厥根  
宮牆重仞允得其門懿乎其純確乎其操洋洋縉紳  
言觀而高棲遲泌丘善誘能教赫赫三事幾行其招  
委辭召貢保此清妙降年不永民斯悲悼爰勒茲銘  
摘其光耀嗟永來世是則是效

文範先生陳仲弓銘

君諱寔字仲弓潁川許人也其先出自有虞氏中葉當



周之盛德有媯滿者武王配以大姬而封諸太昊之墟是爲陳胡公春秋之末失其爵土遂以國氏焉世篤懿德令問不顯君膺皇靈之清和受明哲之上姿憑先民之遐迹秉玄妙之淑行投足而襲其軌施舍而合其量夫其仁愛溫柔足以孕育群生廣大寬裕足以包覆無方剛毅強固足以威暴矯邪正身體化足以陶冶世心先生有四德者故言斯可象靜斯可効是以邦之子弟遐方後生莫不同情瞻仰由其模範從其趣尚戾狠斯和爭訟化讓雖嚴威猛政迫以刑戮未若先生潛導之

速也其立朝事上也恭順貞厲含章直方無顯諫以彰直不割高而引長常幹州郡腹心之任義則進之以達道否則退之以光操然後德立名宣盖于當世辟司徒府納規建謀匡弼三事人用昭明台階允寧遷聞喜長清風暢於所漸儉節溢於監司郡政有錯爭之不從即解綬去復辟太尉府遷太丘長民之治情歛慾反於端懿者猶草木偃於翔風百卉之挺於春陽也以所執不協所屬色斯舉矣不俟終日辟大將軍府道之行廢有分於命乃離密網以就禁錮潛伏不試十有八年大忌



蜀除舉賢良方正大將軍司徒竝辟君曰七十有懸車  
之禮况我過諸途不應其命容止法度老而彌壯凡所  
履行事類博審不可勝數略舉首目具實錄之記在乎  
其傳春秋八十有三中平三年八月丙子卒大將軍三  
公使御屬往吊祠會葬作誄謚曰文範先生刺史太守  
樹碑頌德許令以下至於國人立廟舊邑四時烝嘗歡  
哀承祀其如祖彌先生存獲重稱亡歆血食修行於已  
得斯於人固上世之所罕有前哲之所不過也孤嗣紀  
街恤在疚敢錄言行終始所守乃有二三友生咨度禮

則咸曰君化道神速行于有國法施于民祀典所宗鄉  
人之祠非此遺孤所得專也昔者先生甚樂茲土築室  
講誨精靈所寧紀順奉雅意遂定兆域宜有銘勒表墳  
墓俾後生之歌詠德音者知丘封之存斯也乃作銘曰  
於熙文考天授弘造淵玄其深巍峩其高剛而無虐  
柔而不撓誕鏞模憲示世作教君之誨矣民胥効矣  
道行斯進廢乃斯止鮮我顯忝旣多幽否舍榮取辱  
涅而不緇德之休明賤不爲耻超邈其猶莫與方軌

陳太丘碑



先生諱寔字仲弓潁川許昌人也含元精之和膺期運之數兼資九德總脩百行於鄉黨則恂恂焉斌斌焉善誘善導仁而愛人使夫少長咸安懷之其爲道也用行舍藏進退可度不徼訐以干時不遷怒以臨下四爲郡功曹五辟豫州六辟三府再辟大將軍宰聞喜半歲太丘一年德務中庸教敦不肅政以禮成化行有謚會遭黨事禁錮二十年樂天知命澹然自逸交不諧上愛不黷下見幾而作不俟終日及文書赦宥時年已七十遂隱丘山懸車告老四門備禮悶心靜居大將軍何公司

徒袁公前後招辟使人曉喻云欲特表便可入踐常伯起補三事佩紆金紫光國垂勲先生曰絕望已久飾巾待期而已皆遂不至弘農楊公東海陳公每在衮職群僚賀之皆舉首曰潁川陳君命世絕倫大位未躋慙於文仲竊位之負故時人高其德重於公相之位也年八十有三中平三年八月丙子遭疾而終臨沒顧命留葬所卒時服素棺擲財用視喪事唯約用過乎儉群公百僚莫不咨嗟巖叟知名失聲揮涕大將軍帛祠錫以嘉謚曰徵仕陳君稟岳瀆之精包靈輝之純天不憖遺一



老俾屏我王梁崩哲萎于時靡憲縉紳儒林論德謀績  
謚曰文範先生傳曰郁郁乎文哉書曰洪範九疇彝倫  
攸叙文爲德表範爲士則存誨沒號不兩宜乎三公遣  
令史祭以中牢刺史敬吊太守南陽曹府君命官作誄  
曰赫矣陳君命世是生令光醇德爲士作程資始旣正  
守終有令奉禮終沒休矣清聲遺官屬掾吏前後赴會  
刊石作銘府丞與比縣會葬荀慈明韓元長等五百餘  
人總麻設位哀以送之遠近會葬千人已上河南尹种  
府君臨郡追嘆功德述錄高行以爲遠近鮮能及之董  
部大掾以成斯銘斯可謂存榮沒哀死而不朽者也乃  
作銘曰  
峩峩崇嶽吐符降神於皇先生抱寶懷珎如何昊穹  
旣喪斯文微言圯絕來者曷聞交交黃鳥爰集于棘  
命不可贖哀何可極

陳太丘碑

維中平五年春三月癸未豫州刺史典以褒功述德政  
之大經是以作謚封墓興於周禮衛鼎晉銘其昭有實  
故太丘長潁川許昌陳寔字仲弓含聖哲之清和盡人



才之上美光明配於日月廣大咨乎天地辟四府宰三  
城神化著於民物形表圖於丹青巍巍焉其不可尚也  
洋洋乎其不可測也儉約違時懸車致仕徵辟交至遂  
不屑就春秋八十有三寢疾而終大將軍賜謚群后建  
碑國人立廟先有二子季方元方皆命世希有繼期特  
立季方盛年早亡亦圖容加謚元方在喪毀瘁消形嘔  
血純孝過哀率禮不越于時嘉異畫像郡國欽盛德之  
休明懿鍾鼎之碩義乃樹碑鐫石垂世寵光詞曰於皇  
先生冠耀八荒闡德之宇探道之綱繼期立表以訓四  
方惟亮天工群生之望高明允實有馥其芳載德奕世  
休有烈光欽慕在人舊有憲章過牧斯州庶奉清塵弃  
子而邁靡瞻靡聞嗟我懷矣曷所咨詢告哀金石式昭  
其勤

汝南周巨勝碑

君諱勰字巨勝陳留太守之孫光祿勳之子也君應坤  
乾之淳靈繼命世之期運玄懿清朗貞厲精粹體仁足  
以長人嘉德足以合禮總六經之要括河洛之機援天  
心以立鈞贊幽明以揆時沉靜微密淪於無內寬裕弘



博含乎無外巨細洪纖罔不總也是以實繁於華德盈  
乎譽初以父任拜郎中疾去官察孝廉是時郡守梁氏  
外戚貴寵非其好也遂以病辭太守復察孝廉乃俯而  
就之以明可否然猶私存衡門講誨之樂不屑已也又  
委之而旋故大將軍梁冀專國作威海內從風世之雄  
材優逸之徒莫不委質從命而顛覆者蓋以多矣聞君  
洪名前後三辟而卒不降身由是縉紳歸高群公事德  
太尉司徒再辟三辟察賢良方正州舉孝廉皆病不就  
擾攘之際災眚仍發聖上詢諮師錫策命公車特徵君

仰瞻天象俯效人事世路多險進非其時乃托疾杜門  
靜居里巷無人跡外庭生蓬蒿如此者十餘年強禦不  
能奪其守王爵不能滑其慮至延熹二年乃更闢門延  
賓享宴娛樂及秋而梁氏誅滅十二月君卒然則識幾  
知命可覩於斯矣洋洋乎若德雖崇山千仞重淵百尺  
未足以喻其高究其深也夫三精垂耀處者有表爰在  
上世作者七人焉有該百行備九德齊光日月洞靈神  
明如君之至者與亶所謂天民之秀也享年五十不登  
期考遐邇歎悼痛心矢圖乃相與建碑勒銘以旌休美



其辭曰

厥初生民天賜之性有龐有醇有否有聖伊維周君  
允丁其正誕茲明德自貽哲命煥乎其文如星之布  
確乎不拔如山之固追踪先緒應期作度潛心大猷  
譚思德謨遁世無悶屢辭王寮洋洋泌丘于以逍遙  
萬爾童蒙是訓是教瞻彼榮寵譬諸雲霓優哉游哉  
侔此弘高名振華夏光耀昆苗清風丕揚德音孔昭

彭城姜伯淮碑

先生諱肱字伯淮彭城廣人也其先出自帝胤在皇唐

蓋與四岳共葉能禮於神舜命秩宗爰封于呂其裔呂  
望佐周剋殷俾侯齊國姓有姜氏即其後也高祖祖父  
皆豫章太守潁陰令先生既蹈先世之純德體英妙之  
高姿立性純固百行修備故其平生所能事親惟孝如  
大舜五十而慕友于兄弟有棠棣之華萼韡之度體惠  
理和有上德之素安靜守約恩及嬰兒恬蕩之固至操  
動信邑中化之外戶不閉治藏無隱及其學而知之者  
三墳五典八索九丘俯仰占候推步陰陽有名物定事  
之能獨見先覩之効然猶學而不厭誨而不倦童冠自



遠方而集者蓋千餘人夫水盈而流德交而形是故德  
行外著洪聲外布華夏同稱名振當世凡十辟公府九  
舉賢良方正公車特徵玄纁禮聘又家拜犍為太守太  
中大夫先生盤桓育德莫之肯就不隕獲於貧賤不充  
詘於富貴拔乎其萃出乎其類生民之傑也年七十有  
七建安二年四月辛巳卒於是從游弟子陳留申屠蟠  
等悲悼傷懷懼微言之欲絕感絕論之事乃建碑於墓  
甄述景行曰邈矣先生應天淑靈孝友是備上德是經  
弘此文藝耽怡是寧恂恂善誘童冠來誠有燁其譽有  
煥其聲顯顯群公並加辟命赫赫聖皇仍獲其聘委策  
避國守此玄靜綽乎其裕確乎其操疇昔洪崖雙名並  
高嗟乎殞沒縉紳永悼依依我徒靡則靡効勒銘金石  
彌遠益曜

貞節先生陳留范史雲銘

先生諱丹字史雲陳留外黃人陶唐氏之後也其在周  
室有士會者爲晉大夫以受范邑遂以爲氏漢文景之  
際爰自南陽來家于成安生惠及延延熹二年官至司  
農廷尉君則其後也君受天正性志高行潔在乎幼弱



固已藐然有烈節矣時人未之或知屈爲縣吏亟從仕  
進非其好也退不可得乃託死遁去親戚莫知其謀遂  
隱竄山中涉五經覽書傳尤篤易尚書學立道通久而  
後歸遊集太學知人審友苟非其類無所容納介操所  
在不顧貴賤其在鄉黨也事長惟敬養稚惟愛言行舉  
動斯爲楷式郡縣請召未嘗屈節甚有備禮招延虛已  
迓之者亦爲謀奏其忠直以處士舉孝廉除郎中萊蕪  
長未出京師喪母行服故事服闋後還郎中君遂不從  
州郡之政凡其事君過則弼之闕則補之通清夷之路

塞邪枉之門舉善不拘階次黜惡不畏強禦其事繁博  
不可詳載雅性謙儉體勤能若不樂假借與從事荷負  
徒行人不堪勞君不勝其逸辟太尉府俄而冠帶士咸  
以群薰見嫉時政用受禁錮君罹其罪閉門靜居九族  
中表莫見其面晚節禁寬困於屢空而性多檢括不治  
產業以爲卜筮之術得因吉凶道治民情以受薄償且  
無咎累乃嚮鬲于梁宋之域好事者覺之應時輒去禁  
旣蠲除太尉張公司徒崔公前後四辟皆不就仕不爲  
祿故不牽於位謀不苟合故特立於時是則君之所以



立節明行亦其所以後時失途也年七十有四中平二  
年四月卒太尉張公兗州劉君陳留太守淳于君外黃  
令劉君僉有休命使諸儒叅案典禮作誄著謚曰貞節  
先生昭其功行錄記所履著於耆舊刊石樹銘光示來  
世

於顯貞節天授懿度誕茲明哲允迪德譽如淵之清  
如玉之素罔之不濁涅之不污用行思忠舍藏思固  
伯夷是師史鮪是慕榮貧安賤不恡窮迂其死善道  
遺名之故身沒譽存休聲載路

玄文先生李子材銘

玄文先生名休字子材南陽宛人也其祖李伯陽周柱  
下史覲衰世而遁焉其後雄俊豪傑往往崛起自戰國  
及漢名臣繼踵枝胄散逸其遷于宛尚矣王莽竊位漢  
祚中移考翼佐世祖匡復郊廟錫封茅土卿相牧守于  
時相逐休少以好學游心典謨既綜七經又精群經鉤  
深極奧窮覽聖旨居則玩其辭動則察其變雲物不顯  
必考其占故能獨見前識以先神意若古今常難疑義  
錯繆前人所希論後學所不覽休盡剖判剝散幽暗靡



不昭爛猶發憤於目所不覩體所不閑遂登東岳觀百  
王遺風習容闕里以協禮秉退而講誨童冠仰焉傳傳  
如也郡署五官掾功曹司空胡公顯以儒譽特進大鴻  
臚仍優禮固請秉讓執虛辭此三命不爲利回不爲義  
疚臨寵審已不動其守可謂純潔皓素綽有餘裕者已  
其於鄉黨細行敦睦九族篤信交友不可得而詳也初  
娶配出後配未字年旣五十苗胤不嗣以永壽二年身  
五月乙未卒凡其親昭朋徒臭味相與大會而葬之鼎  
俎之禮節文曲備時令戴君臨喪命謚郡遣丞掾冠蓋  
刊斯石懿德是不

咸屆旣定而後罷焉於是故好友朋僉以爲仲尼旣沒  
文不在茲韞積美玉喪莫賈之求而無繼悽爾永思乃  
刊斯石懿德是不  
吁茲先生秉德恭勤天啓哲心其學孔絕經緯是綜  
雅麗是分行已守道匪禮不遵處約不威聞寵不欣  
榮不能華威不能震天淑厥命以讓以仁有惠云載  
惟邦之珍按典考謚謚以玄文身沒名彰配黔作隣  
遺譽罔極丕昭億年嗚呼哀哉

處士國叔則銘



伊漢二十有一世處士有園典字叔則者夫其生也天  
眞淑性清理條暢精微周密包括道要致思無形深總  
曆部織入藝文藻分葩列如春之榮守根據窮不虛其  
聲偉德若茲惟世之英乃遂隱身高藪稼穡孔勤童蒙  
來求彪之用文不義富貴譬言諸浮雲州郡禮招休命交  
集徒加名位而已莫之能起也博士徵舉至孝耻已處  
而復出若有初而無終潔耿介於丘園慕七人之遺風  
年七十有五建寧二年六月卒臨沒顧命曰知我者其  
蔡邕乃爲銘載書休美俾來世昆裔未有諷誦於先生

之德其辭曰

氏之齊敏卓時挺生思心精獻綜物通靈術有玄妙  
于時游情聞道睹異惕然若驚守死善操與世無營  
渾其若濁徐然後清綽其若煥終其益貞有恒實難  
獨秉其經嗟爾來世是瞻是聽

蔡中郎文集卷之二終







程子